



## 光頂鴨嫲

園仔裡背孵出一竇細鴨子，隻隻看起來都盡得人惜。這兜細鴨子跔等大鴨仔學習在園仔生活个種種本事，一日一日大。鴨嫲每一隻都同毛打理啊淨淨靚靚，想愛得著「最靚个鴨嫲」个名聲；鴨公仔一隻比一隻過砸，一隻比一隻過雄猛。這兜鴨公爭地盤、號所在，就係想愛展分鴨嫲看，好爭著鴨嫲个心。

鴨公係有看著合意个鴨嫲就好去撩佢，佢等最好用个方式就係去掙鴨嫲个頭那毛。愛靚个鴨嫲分人掙著毛，痛啊噉噉滾，走都無哪好屏命。下後見係看著鴨公行前，隻隻都先瀉先贏，毋敢分這兜魯夫个鴨公憑兼來。

毋過，有一隻鴨嫲走毋遽，故所厥頭那頂漸漸仔就分該兜鴨公掙啊伸無幾多支毛。一隻靚靚个鴨嫲，就恁仔變做一個「光頂鴨」。開滿佢自家還無麼个感覺，就淨覺著鴨公好撩佢。但係日仔久咗，大家人嘎開始噉佢，講仰會有恁醜个「光頂嫲」。

初下，別人噉佢，佢自家還無恁多。有一日，佢去魚塘搞水个時節，低頭一看，嘎分自家个樣子嚇啊緊噉。佢心肚譴自家，本來係一隻靚靚个鴨嫲，仰這下會變做恁醜？難怪該兜鴨嫲都會噉佢「光頂嫲」！佢十分惱該兜撩佢个鴨公，毋過這下講麼个都無用，佢都對自家也無信心咗！

天時漸漸愛轉寒咗，園仔肚个鴨仔換核一身毛，這下隻隻都係大鴨仔咗！生來靚个鴨嫲，一隻一隻分主人扭走咗！「光頂嫲」本係光頂，驚會分人噉，就一個人屏啊在園仔角下。該兜鴨公也共樣，隻隻淨愛靚，主人來扭个時節走毋遽，歸尾就淨伸著該隻最靈通个無分主人扭走。

該鴨公就撩佢講：「你看啊！隻隻鴨嫲都分主人扭走咗，就淨伸你這隻『光頂嫲』主人無愛，佢等聚概都分主人扭去參加比賽，看麼人最靚。你正式係最醜个，故所主人正留你在這，『光頂嫲』就係『光頂嫲』，還噉哦！」

連主人扭伸个鴨公都恁仔噉佢，「光頂嫲」聽著，心肝肚盡艱苦。佢一個人行歸去園仔角下个竇，屏啊在該慍悴，自家緊恁：「佢定著係生啊盡噉，係無，主人仰毋愛佢？佢仰淨愛該兜靚靚个鴨仔？佢正式係一個無用个人。」佢緊恁，就對自家又過無信心。

有一日，主人同厥姐仔來咗！看著鴨嫲个樣子，就同厥姐仔講：「你看，這隻鴨嫲頭那頂頂無毛，表示佢定著會生卵，又搭錫得著鴨公，係做得留來做種个好鴨嫲，無像其他分佢扭走个，淨好看定定，早早賣核過好。這隻鴨嫲，佢等留佢做種，恁仔正會有好再生卵孵鴨子出來，日後正會再有鴨仔好畜。」

「光頂嫲」聽著主人講个話，一下仔嘎暢啊緊撥等翼，緊講：「光頂又仰仔？光頂又仰仔？」

作者：陳志寧

### ☆詞彙學習☆

【光頂】gong' dang'：頭頂光禿的。

【初下】cu' ha：一開始。

【掙】dui'：拉扯。

【靈通】lin' tung'：動作敏捷。

【見係】gian he：每次、每當。

【做種】zo zung'：當作繁殖用的種苗。

【開滿】koi' man'：剛開始。